

**Seni Preseten
Henry B. Eyring**
Aewin Chon Aninis non
ewe Aewin Presetensi



Ewe Finata ren Manauen Kinisou

Semach won Nang a annuku ngeni kich ach sipwe kinisou ren mettoch meinisin (nengeni 1 Thessalonian 5:18), me a mochen sipwe kinisou ren ach kewe feioch a fang ngeni kich (nengeni D&C 46:32). Sia sinei pwe meinisin An kewe annuk a awora ngeni kich pwapwa, me sia pwan sinei pwe ika sia atai an kewe annuk a awora ngeni kich netipechou.

Iwe ren ach sipwe pwapwa me kunu seni mi ngaw, siwpe fokkun kinisou non netipach. Sia kuna non manauach ewe chufengenin kinisou me pwapwa. Kich meinisin sia mochen mefi kinisou, nge ese fokkun mecheres ach sipwe kinisou non mettoch meinisin ren ekkewe sosotun ei manau. Samau, netipengaw, me manon ekkewe sia fokkun tonger epwe fis non manauach. Ach aurek a aweiresi kich ach sise kuna ach kewe feioch me kinisou ren ekkewe feioch Kot a isoni fanitach non ekan ran mwaach.

Mi weires ngeni kich ach sipwe aneani ach kewe feioch pokiten sia kan anamwotongawa met mi murrino. Nupwen ese chuen wor imwach, anach möngö, are ewe tongen chienach me ach kewe famini, sia esinna pwe mi namwot ach sipwe fen kinisou nupwen ra nom rech.

Napengeni, fan ekkoch a fokkun weires ngeni kich

ach sipwe kinisou ren ekkewe niffang mi auchea sia angei: uputiwen Jises Kraist, An we Achasefan, ewe pwonon manausefan, ewe tufichin pwapwaiti manau ese much ren ach kewe famini, ewe Aniwinsfaniton ewe kapas allim ren ewe pristut fiti ekkewe kii. Seni chok anisinin ewe Ngun mi Fel sia tongeni poputa ne mefi auchean ekkana feioch ngeni kich me ekkewe sia men tonger. Iei chok atun sipwe tongeni epinukunuk ne kinisou non mettoch meinisin me kunu seni ewe tipisin ach sise kinisou ngeni Kot.

Mi namwot pwe sipwe tingor non iotek pwe Kot, seni manamanen ewe Ngun mi Fel, epwe anisi kich ach sipwe kunaochu ach kewe feioch ina mwo ika sia nom nukapanen ach kewe sosot. A tongeni anisi kich seni manamanen ewe Ngun mi Fel ach sipwe esinna me fokkun kinisou ren ekkewe feioch sia kan anamwotongawa. Met a wesen anisie ei ena tingor ngeni Kot non iotek, “Kose mochen kopwe emweni ei ngeni emon upwe tongeni anisi fan itom?” Nupwen ua anisi Kot ne efeiochu ekkoch ua kunaochu pwisin ai kewe feioch.

Ai iotek a pwonu fan eu nupwen ruemon mi pupunu use sisineir ra etiwa ei ai upwe no ngeni eu pioing. Iwe ua kuna emon kukun monukon amen

fokkun kukun ua tongeni komoch non pei. A chok keran ruu wikan, nge a wor an we samau a fen reirei ren fan fitu. Ekkewe tokter ra ereni seman me inan pwe mi namwot ar repwe fori pwan eu angangen reirei mi weires ika pwe foun ngasangasan epwe tongeni awora manau ngeni ena kukkun noun Kot.

Seni tingor an ekkewe sam me in, ua ngeni ewe monukon eu efeiochun pristut. Ewe efeioch a masou ngeni eu pwonen manau epwe sopouloso. Me nukun ai ua fori ewe efeioch, Ua angei ewe feioch won pwisin inisi ren ai ennetin kinisou non netipei.

Ren an Semach aninis, kich meinisin sia tongeni finata ach sipwe manauen kinisou. Sia tongeni tingorei an epwe anisi kich ach sipwe kunaochu ach kewe feioch, ren mettoch meinisin. Ngang non na fansoun, ua fokkun ennetin kinisou ren ewe manamanen foun ngasangasei mi ngasangasoch. Ua fokkun kinisou nupwen ua niwino imwei we ren ekkewe feioch ngeni nei kewe semirit ua tongeni kuna ochu pwe manamanen kirekirochun Kot me seni ekkewe aramas mi murino ra chok nom unukur.

Napengeni, ua mefi ai kinisou ren ewe Achasefan a angang non manau ei me manauen ekkewe sam me in. Ua kuna epinukunuk me ennetin tong an Kraist a asarama non meser, pwan tori non ar kewe riafoun sosot. Me ua mefi ewe manaman ka pwan tongeni mefi ika pwe ka tingor ngeni Kot an epwe pwari ngonuk ika pwe ewe Achasefan epwe anisuk om kopwe mefi epinukunuk me tong.

Kich meinisin sia tongeni finata ach sipwe kinisou non ach iotek me tingor ngeni Kot ren aninis ach sipwe anisi ekkoch—akkaewin non ei fansoun sia achema uputiwen ewe Chon Amanau. Kot ewe Sam a fang Noun we At, me Jises Kraist a fang ngeni kich ewe Achasefan, ewe auchean me nein niffang meinisin a fang ngeni kich (nengeni D&C 14:7).

Kinisou non iotek a tongeni anisi kich ach sipwe kuna auchean ekkei feioch me ekkewe ekkoch feioch me sia angei ewe niffangen anapanon kinisou non netipach.

AFANAFAN SENI EI POR AUS

Maketiwen met ekkewe a fis ngeni kich me ach kewe feioch a tongeni anisi kich ach sipwe chechemenir me a awora ngeni kich mettoch epwe achema ngeni kich. Kopwe ekiekin om kopwe tingorei ekkewe ka asukuner ar repwe maketi w met ekkewe ra kinisou ren—epwe anisir ar repwe chechemeni ekkewe feioch ra angei, esina ekkewe feiochun iei, me nikitu ngeni ekkewe feioch non ekan fansoun mwach.

Kopwe pwan pesei ngenir ar repwe tapweno an Preseten Eyring we nenien appiru ne tingor ngeni Semach won Nang an epwe emwenir ngeni emon repwe tongeni anisi are angang ngeni.

SERAFO

Fokkun Manauen Kinisou

Seni John Hilton III me Anthony Sweat

Sisap chok poraus usun ach sipwe aneani ach kewe feioch—pwe sipwe pwan föri! Kopwe maketi w echo taropwen 100 mettoch ka kinisou ren. Ika pwe ka ekkieki pwe a kan chommong, kopwe sotuni ei:

1. Kopwe maketi w 10 sokkun nipwakochun inisum ka kinisou ren.
2. Kopwe maketi w 10 pisekum ka kinisou ren
3. Kopwe maketi w 10 aramas mi manau ka kinisou ren.
4. Kopwe maketi w 10 aramas ra mano ka kinisou ren.
5. Kopwe maketi w 10 mettochun fonu ka kinisou ren.
6. Kopwe maketi w 10 mettochun ikenai ka kinisou ren.
7. Kopwe maketi w 10 neni non fonufan ka kinisou ren.
8. Kopwe maketi w 10 sokkun mettoch minafo ka kinisou ren.
9. Kopwe maketi w 10 sokkun möngö ka kinisou ren.
10. Kopwe maketi w 10 mettoch usun ewe kapas allim ka kinisou ren.

Nupwen sia föri ei sokkun, sia tongeni sinei pwe eu tettenin 100 ese tongeni an epwe fen tori ukukun ekkewe feioch meinisin minne Kot a fang ngeni kich.



Nuku • Famini • Aninis

Eu Naponon Föfför

*Kopwe aneani ekkei mettoch, me nupwen mi och, kopwe aporausa ren ekkewe fefin ka churi.
Kopwe aea ekkewe kapas eis epwe anisuk ne apochokuna ekkewe fefin ka churi me pwan
aochu manauom ren aean Fin Anisi.*

Ewe Samon, An we Mwichefen, famini, me chon neniach kewe a auchea ngenir ekkewe fefin mi murino. Ewer pwe, Elder M. Russell Ballard seni ewe Mwichen Engon me Ruemon Aposel mi apasa, “Iteitan fefin me non ei Mwichefen mi pwon fengen ren ewe Samon a angei ewe wis ne aninis ne amana nau ngun, ne emweni ekkewe fefin me won ei fonufan, ne apochokuna ekkewe imwen Saion, me förata ewe muun Kot.”¹

Ekkoch ekkewe fefin repwe ekieki ika repwe tongeni apwonueta wiser kewe mi auchea. Nge usun chok Eliza R. Snow (1804–87), Aru-emonun presetenin Fin Anisi, a awe-wei, “Esap tiweno mwo emon fefin, me wisan we epwe wenewen pwe met a tongeni föri eu watten mettoch an epwe kouta ewe Muun Kot won ei fonufan.”² Sister Snow a pwan afa-nafana pwe ewe mwichen Fin Anisi a foruta “ren apwonuetan iteiten föfför me angang mi murrino.”³

Achocho non mwichen Fin Anisi a awatteno ach we tufichin anisi emon me emon pwich kewe ne anapano ar nuku, apochokuna famini me imw, me awora aninis non imw me non unusen fonufan. Iwe sia kinisou pwe, achochon emon me emon neich chon Fin Anisi ese namwot an epwe watte me apekus, pwe a chok namwot an epwe feito seni netipach me epwe fis iteiten.

Foforoch usun chok ach pwisin iotek me iotekin famini, aneani pukfel iteiten ran, me wenecharen föri wisach non Mwichefen epwe tongeni anisi kich ne anapano ach nuku me kouta muun ewe Samon.

Ngeni ekkewe fefin minne ra ekieki ika pwe ei angang a awora eu ekesiwin, Elder Ballard a apochokuna: “Ekkewe fefin ra fokkun wenechar me nukuchar ra tongeni kisikisino pochokunen ewe tefin. Meininis ekkewe fefin ra apochokuna me tumunu ar famini ra föri an Kot we angang. Meininis fefin a manau non Kot a winiti emon chon anisi ekkewe ekkoch ar repwe tapweno me fotuki ekkewe foun iran murino ren ar repwe kinikin uwa murino seni non ekan fansoun mwach.”⁴

Seni Ach Uruo

Eliza R. Snow, ewe a wisen seke-teri non ewe mwichen Fin Anisi non Nauvoo nupwen a keran föruta, a kokko seni Preseten Brigham Young (1801–77) an epwe feino ekkis meininis non ewe Mwichefen, ne anisi ekkewe pisop ne forata ewe mwichen Fin Anisi non ar kewe wart.

Sister Snow a apasa: “Ika pwe emon me nein ekkewe fefin me nengin non Israel ra mefi akukkunano[mi kouk] non unusen manauer, iwe repwe sinei ifa sokkun ar repwe ekieki are angang

murino fan iten ekkewe aramas ra fokkun tonger. . . . Preseten Young a isetiw ewe ki ngeni ewe watten me naponon föfför me namwot.”⁵

ESINESIN

1. M. Russell Ballard, “Women of Righteousness,” *Liahona*, Dec. 2002, 39.
2. Eliza R. Snow, “An Address,” *Woman’s Exponent*, Sept. 15, 1873, 62.
3. Eliza R. Snow, “Female Relief Society,” *Deseret News*, Apr. 22, 1868, 81.
4. M. Russell Ballard, *Liahona*, Dec. 2002, 39.
5. Eliza R. Snow, *Deseret News*, Apr. 22, 1868, 81.

Seni ekkewe Pukfel

1 Corinth 12:4–18; 1 Timothy 6:18–19; Mosaiä 4:27; Ekkewe Nongonongun Achifoua 1:13

Met Ua Tongeni Föri?

1. Ifa usun ai upwe tongeni anisi pwi kewe ua churir ar repwe esinna me anganga ar kewe tufichin ar repwe winiti eu nenien appiru mi murino?
2. Ifa usun ai upwe tongeni aea niffangei kewe me ai kewe ni-pwakoch ne efeiochu ekkoch?

Ren pwan ekkis poraus, kopwe feino won www.reliefsociety.lds.org.